

aparechia tuti li soi navilli per far grande armata in mar, et ha pur assai galie preparà. Aviso come, a di 15 Fevver, l'è venuto do olachi et hanno menà tutti li marangoni et calafai et gran maistranza a Constantinopoli, et lavorano l'armada; *tamen*, per quanto se puol intender, questo anno non insirà per Soria. Aviso come l'è venuto un che se chiama Luchis corier con un comandamento del Signor turco, che niun navilio se parta per andar in Soria, et se nisun vol andar dagi una piezaria de tornar el navilio et li homeni; et nisun non puol cavar cera, nè selle, nè arme. Aviso che l'è venuto una fusta de banche 18, ben armada. El Signor de qui li hanno mandà a tuor le velle et timon, che loro haveva uno altro timon et vela et sono scampà a la volta de Barbaria; et el ditto Signor subito à armà una fusta de banchi 14 che vadi a la volta de Barbaria drieto questa; hanno dato piezaria di tornar etc.

142* Fu posto, per sier Gasparo Malipiero, sier Marco Minio, sier Hironimo Justinian savii a terra ferma, una letera al capitano zeneral. La conclusione era, che ben considerato il tutto e il danno saria s' il nostro esercito havesse qualche danno, *maxime* in questi tempi, l'opinion nostra col Senato è che soa excellentia destramente ritorni verso Padoa, lasando in Vizenza quelle zente li par etc. A l'incontro, li Savi dil Consejo e do di terra ferma, sier Zuan Badoer dottor cavalier et sier Piero Trun, voleno indusiar fin doman, perchè se intenderà meglio quello farano i nimici, et si potrà poi scriver più maturamente. Parloe prima sier Gasparo Malipiero; li rispose sier Leonardo Mozenigo savio dil Consejo. Poi parlò sier Francesco Foscari el cavalier, Cao di X, qual sente la letera et non sbaraiarsi adesso che si aspeta la venuta dil re di Franza in Italia, qual ne darà il nostro Stado; li rispose sier Polo Capello el cavalier, savio dil Consejo, che non è da far questa movesta adesso per cossa dil mondo, per le raxon el disse, di sopra notate. Li rispose sier Marco Minio. Poi parlò sier Zuan Badoer dottor e cavalier, per la indusia fin doman. Parlò sier Alvise di Prioli, fo savio a terra ferma, qual non se discostava di la letera, ma voleva mitigarla alquanto. Ultimo parlò sier Francesco Bolani l'avogador di comun, era inrochido, e niun l'intese; fo tedioso al Consejo, dicendo ogni zorno l'averemo in renga. Andò le parte: 88 di la letera, 106 di l'indusia fin doman, et fo sagramentà il Consejo a banco a bancho e comandà grandissima credenza. Et licentiat Pregadi a hore 23, restò Consejo di X

simplice, et feno uno cassier per mexi 4, in loco di sier che à compito, sier Marco Orio, fo governador di l'intrade, qual ozi aponto intrò in ditto Consejo di X in loco di sier Piero Lando, qual è intrado Governador di l'intrade.

Exemplum

143

1515, a di 25 Marzo, in Nicoxia.

Da novo, circa al Sophi, per Hanibal Malipiero nostro ultimamente dal Scandellorum si à, come per uno turco si atrovò nel facto d'arme, à inteso che, atrovandosi el Turco soto Tauris, divise el suo exercito in 3 parte, le qual una a l'altra socorer non potea per le aque che erano cresute. Il capitano del Sufi, che si atrovava in la tera *cum* persone circa 30 milia, deliberò arsaltar quella parte dove era la persona del Signor turco; donde al primo afrectar tagliò a pezi quasi tuto el campo de la Gretia, per la qual cossa il Signor turco fece dar fuoco a la artelaria, la qual amazò sì de li sui, come de li sofini. Da poi dete dentro *cum* li janizari in li cavali disordinati da la artelaria, dove fu morto il capitano dil Sufi et suo fratello *cum* quasi tute le persone 30 milia, et *cum* quella vigoria el Signor turco entrò in Tauris et sentò ne la sedia del Sufi. Et tolto la molgier et tute le done da ato, et la casenda, 400 somme di seda, 300 marchadanti li primi di tuta Azimia, 3000 maistri che fano arme azimine, si mese a camin per l'Amasia, dove al passar de l'Eufrate, da poi passati li dui terci de l'exercito, fo arsaltato da dredo da' zertziani, li quali talgiorno a peci circa persone 15 milia, et feceno anegar pure di altratante et li tolseno peci 11 di artelaria. El Signor turco avea lizenciate tute le zente et mandati i gianizari et el resto di la Porta a li alozamenti, *cum* ordine che per tuto April tuti sia dove lui comandarà. Ritrovandosi ne l'Amasia, li vene uno ambasador di Sofi, dicendo che di la preda, zoè sede et danari, li galdese, et che a li marchadanti dovesse dar talgie honeste che le poteseno pagar, et che non voleva altro da lui salvo che ge restituise la molgier et le done *cum* li maistri, offerendosi di esser suo amico et bon fratello; donde el Turco rispose non voler far niente. Et dapoi molte parole, lo ambasador el desfidò da parte del suo Signor, dicendoli che el non voleva venir da ladro nel suo paese secondo l'avea facto lui, che era venuto a robar, ritrovandosi la persona sua zornate 60 lontan et poi se era fuzito *cum*